

**Uunga siunnersuut: Inatsisartut aalajangiiffigisassaattut siunnersuut Kalaallit Nunaannut inatsisissatut siunnersuummut, taarsigassarsisitsisarfiit aamma aningaasaliisarfiit aningaasaateqarnissaat aamma nakkutilliinermi piumasaqaatit pillugit. (CRR) , (UPA 2015/107) aamma Akiligassarsisitsisarfinnut aningaasaliisarfinnullu aningaasaateqarnissaq nakkutilliinikkullu piumasaqaateqarnissaq pillugu inatsisimmut Kalaallit Nunaannut atuuttussatut siunnersuummut oqaaseqaateqarnissaq pillugu Inatsisartut aalajangiiffigisassaattut siunnersuut (CRD IV-mik atuutsitsilerneq) (UPA 2015/96)**

(Inuussutissarsiornermut, Suliffeqarnermut, Niuernermet Nunanullu Allanut Tunngasunut Naalakkersuisoq)

### **Saqqummiussinermut allakkiaq**

(Inuussutissarsiornermut, Suliffeqarnermut, Niuernermet Nunanullu Allanut Tunngasunut Naalakkersuisoq)

### **Siullermeenera**

Matumuuna Inatsisartut aalajangiussassaannut siunnersuutit marluk saqqummiutissavakka. Akiligassarsisitsisarfinnik aningaasaliisarfinnullu aningaasaatinut piumasaqaatit aamma nakkutilliinikkut piumasaqaatit pillugit Kalaallit Nunaannut inatsisissatut siunnersuut (UPA 2015/107), aamma aningaasaqarnermik suliaqarneq pillugu inatsisip allangortinnissaa pillugu inatsisimmi § 1-ip ilaanik Kalaallit Nunaannut atuuttunngortitsinissaa pillugu kunngip peqqussutaanut Namminersorlutik Oqartussat oqaaseqaateqarnissaat pillugu Inatsisartut aalajangiussassaattut, inatsisinillu assigiinngitsunut allanut siunnersuut (UPA 2015/96).

Siunnersuutit taakku marluk ataqatigiissutut oqaluuserisassanngorlugit ilanngunneqarput, taamaattumillu tamarmiutillugit saqqummiunneqarput. Siunnersuutitut pineqartunut marlunnut ataqatigiissutut oqaluuserisassani immikkoortoq 86-itut Akiliisarnermi kiffartuussissutit aningaasallu elektroniskiusut pillugit inatsisip Kalaallit Nunaannut atuutsinneqalernissaa pillugu attuutsinneqalernissaanut aaqqiissummut oqaaseqaatissaaq pillugu Inatsisartut aalajangiiffigisassaat oqaluuserisassanngorlugit ilanngunneqarsimagaluarpoq. Taamaattorli ataatsimiinnermut matumunnga oqaluuserisassatut peqqussummut siunnersuut Inuussutissarsiornermut Ministereqarfiup naammassisinnaasimanngilaa. Oqaluuserisassaaq UKA 2015-imut kinguartinneqarpoq, tamannalu ilutigalugu ullumikkut oqaluuserisassanngorlugit pingaarnertut siunnersuutit marluk Inatsisartut akuersissutigisaqarnerisa kingunerisaattut inatsisini allannguutit arlallit

pillugit atuutsitsilernissamut peqqussutit oqaaseqaateqarfiunissaat pillugit Inatsisartut aalajangiussassaannut siunnersuutinik Naalakkersuisut saqqummiussaqaassapput.

Inatsisissatut siunnersuummut siunertaq tassaavoq Kalaallit Nunaanni aningaasaateqarnissamik piumasaqaammut peqqussutip (CRR-imut peqqussutip) atuutsilernissaa, taamaaliornikkullu peqqussutip nassatarisaanik Danmarkimi aamma Savalimmiuni pisutut Kalaallit Nunaanni malittarisassiat assigiit atuuttuunissaannik qulakkeerinissaq.

Aningaasaateqarnissamik piumasaqaammut peqqussummi aalajangersakkat imarineqartut atuutsilernerisa nunatsinnut aningaasaqarnikkut immikkoortumut inatsisaasunik, nakkutilliinermik aarleqquteqarfinnillu aqutsisoqarnermik nukittorsaassaaq, taamaalillunilu akit allangorarfianni killup tungaanukarnermut immikkoortoqarfik akiuulluarsinnaanerutilerlugu.

Aningaasaateqarnissamik piumasaqaammut peqqussummi aalajangersakkat danskit inatsisaasa allagarineranut allangortinneqassanngillat, danskilli inatsisaannut ilanngussatut ilaatinneqassallutik. Inatsisissatut siunnersuummut oqaaseqaatini peqqussummi aalajangersakkat erseqqinnerusumik nassuiarneqarput.

Aningaasaateqarnissamik piumasaqaammut peqqussutip aningaaserivinnit ikiorsiinernut aningaasaqarnikkullu sullissinernik ikiorsiinernut niuerfiusuni instituttinut nakkutilliinermut tunngasutut piumasaqaatit imarai. Aningaasaateqarnissamik piumasaqaammut peqqussutip siunertaa tassaavoq niuerfinni taakkunani suliaqartut aningaasaqarnikkut aalaakkaasuunerisa qulakkeersimanissaat, aammalu aningaasaliisartuusut annertuumik illersorneqarfiunerat. Saniatigut niuerfiup naammaginatsumik atuuttuunissaanut malittarisassiat ilapittuinissamik siunertaqarput.

Kalaallit Nunaat peqqussummut ilaalissappat instituttinut niuerfigisamik pigisaannik aningaasanik imaluunniit naleqartitanik pappialanik toqqortarinnittunut aningaasaqarnikkut piumasaqaatinut tunngatillugu Danmarkimi aamma Savalimmiuni pisartutut Kalaallit Nunaannut malittarisassat assingi atutilissapput. Tamanna aningaasaliisunut assiaarnerusumik illersuineramik, aammalu instituttinut suussutsimikkut assingusunut, nunatsinni imaluunniit danskini aningaaseriviit pineqaraluarpata naammaginatsumik unammillernikkut atugarisassanik qularnaarsissaaq.

Peqqussummi aalajangersakkanik atuutsitsilernikkut inatsisissatut siunnersuutikkut ilaatigut aningaasaateqarnissamik piumasaqaatinut, annertuumik peqataaffigisanut, akiliisinnaassutsimut aamma ilisimatitsinissamik piumasaqaatinut malittarisassiat nutaat aalajangersarneqassapput.

Kunngip peqqussutaanut Namminersorlutik Oqartussat oqaaseqaateqarnissaat pillugu Inatsisartut aalajangiussinissaannut siunertaq akiligassarsisitsisartunut aningaasaliisarfinnullu aningaasaateqarnissaq nakkutilliinikkullu piomasqaateqarnissaq pillugu Kalaallit Nunaannut inatsisimmuut Namminersorlutik Oqartussat oqaaseqaateqarnissaat pillugu Inatsisartut aalajangiussinissaannut siunnersuummut qanimut attaveqarfeqarpoq. Siunnersuutit taakku marluk attaveqatigiippuut EU-mi akiligassarsisitsisarfinnut aningaasaateqarnissamillu piomasqaammut malitassap (CRD IV-p) ilaatitatullu peqqussutip (CRR-ip) malitsigisaannik malittarisassianut nunatsinni aningaasaqarnikkut inatsisaasut naapertuutsilerlugit pisariaqarlutik.

Aningaasaqarnermik suliaasaqarfimmi Kalaallit Nunaanni inatsisaasut danskini nunat tamalaanilu inatsisaasunik, minnerunngitsumillu EU-mi malittarisassanik tunngaveqarput. Naalagaaffeqatigiinni aningaasaqarnermik suliaasaqarfimmi assigiiaartumik inatsiseqarnerup Kalaallit Nunaanni aningaasaliisarnermut malittarisassat sorliit atuunneri pillugit, ilanngullugulu Kalaallit Nunaanni inatsisaasut nunat tamalaani najoqqutarisanik malittarinninnera pillugu nalornisoornerup pinngussannginnera qularnaassavaa. Kalaallit Nunaanni unammillersinnaassusilimmik aningaaseriveqarnerup attassinnaanissaanut tamanna pisariaqarpoq. Aalajangiussassatut siunnersuutit taakku marluk akuersissutiginerisa aningaasaqarnermik suliaqarfimmi nunat tamalaani inatsisilersuinerlut kingullermut nunatsinni aningaasaqarnikkut inatsisaasut naapertuutsilissavai.

Malittarisassat najoqqutallu pillugit nalornisoorneq nunatsinni aningaaserivinnut nunat tamalaani aningaasanik niuerfiusuni aningaasanik pissarsiornerup akisunerulersinnaaneranik nassataqarsinnaavoq, taamaalillunilu namminersortunut inuussutissarsiorfinnullu, ilanngullugit namminersorlutik oqartussanit pigineqartutut suliffeqarfimmi taarsigassarsiniarneq akisunerulissalluni. Nunatsinni aningaaserivinnut sinaakutissatut piomasqaataasut pillugit nalornisoorneq pinaveersinniarlugu Naalagaaffeqatigiinni, ilanngullugulu Savalimmiuni atuuttuusut assigilersillugit aningaasaqarnermik suliaqarfiusumi pisaartumik naleqqussaasoqarnissaq pingaartuuvoq.

Taamaattumik siunnersuutip kingusissukku tunniunnissaanut akuersissut pillugu Inatsisartut siulittaasoqarfiata qinnuiginissaanut Naalakkersuisunut assut pingaarutilinnik tunngavissaqartoqarsimavoq, taamaalilluni naalisakkami tusarniaassutigalugu ataatsimiinnermi matumani oqaluuserineqarnissaanut ilanngunneqartissinnaanarlugu.

Taamatut oqaaseqarlunga, aammalu inatsisissatut siunnersuummut oqaaseqaatigisanullu annertuunut tassunga ilaasunut, kiisalu peqqussuummut siunnersuummut, tassungalu ilaasutut imaqarniliamut innersuussillunga aalajangiussassatut siunnersuutit taakku marluk akuerisassanngorlugit innersuutigissavakka.